



14085

Mag. St. Dr. P

Anna Kozja

Kanonn H. dei. fess. Flores sepulchrales inser-
ptorum in ducali tumulo.

PANEG. M. VITAE

Polon. Vol.

N^o 129

Biblioteka Jagiellońska



stdr0002001

FLORES
SEPVLCHRALES
INSCRIPTIONVM.

Quos

Immortalium beneficiorum conscia
Societas IESV,

In Ducali Tumulo

ILLVSTRISSIMÆ DOMINÆ,

D. ANNÆ ALOYSIÆ,
CHODKIEVICIÆ,
PALATINÆ VILNENSIS,

Ducissæ in Ostrog.

Fundatricis & Parentis suæ munificentissimæ,
Religiosis manibus sparsit.



CRACOVIAE.

In Officina Vidue & Heredum Francisci Cæsarij, S. R. M. Typog.

Anno Domini, 1654.

17 M.



Solenne erat
Matronarum Illustrium T V M V L O S
F L O R I B V S spargere.

Rosin. lib. 9. Antiq. Rom.



In Antiquorum memoriis obserues, F L O R E S
adhiberi in S E P V L C H R O R V M ornamentum.
Vetustum esse morem, multa huius generis do-
na M A N I B V S mitti solita indicant. Imò quos-
dam T E S T A M E N T O etiam cauissè legas,
vt iis F L O R I B V S quotannis
P A R E N T A R E T V R.

Valer. lib. 55.



D. O. M.

Deo, qui aufert *Spiritum Principum*,

Qui mutat Tempora, & *Ætates*,

Qui transfert Regna atque constituit;

A quo omnis Principatus & Imperium:

Posthumam

Illustrissimorum Principum,

Ducum in Ostrog,

M I T R A M;

Post tot Annorum, immo *Ætatum*, mutuo datum vsum,

Ex Ducali Capite

Ad Triumphales pedes,

A N N A A L O Y S I A C H O D K I E V I C I A,

Principum ac Ducum in Ostrog Hæres,

Supplex deponit.

Nos verò interim,

Quibus immortalium beneficiorum conscientia,

Diem ad hunc tumultum dicit,

Vobis Illustrissimi Manes:

Tibi inquam

A N N A A L O Y S I A

C H O D K I E V I C I A,

Dux in Ostrog,

Palatina Vilnensis,

Eo quo decet pupillos luctu,

In pagina hac parentamus.

Manibus date Lilia plenis,

Purpureos spargam flores,

Purpureos inquam:

Dan. cap. 2.
7. 21.

Quod nec immortalibus in nos beneficijs tuis,

Pares Gratias;

Nec luctuoso Funeri Tuo,

Pares lacrymas, adferamus;

Natiuâ hîc Religiosi pudoris purpurâ, carere non possumus.

Sed tibi nimirum istud, beneficijsque tuis imputandum.

Ingens eorum magnitudo,

Tenuitatem nostram omninò obruit.

Adeòque par nomini Tuo, maior meritis nostris Beneficentia,

Propè nos cogit esse ingratos.

FLORES ergò Tibi damus, qui Fructum non possumus,

Oppressis Schismaticâ immanitate,

(Dum eleganter euoluuntur) Fructibus,

Soli nobis **FLORES** supersunt.

Succisis parricidali ferro,

Amœnioribus munificentiae tuæ viridarijs,

Cùm auara manus, nec floribus pepercit, nec frugibus,

Et ipsamet Florum seminaria, in fatales redegit cineres,

Quid aliud à nobis expectares, præter

Hinc illic manu subitariâ collectos

FLORES;

Eosque **SEPULCHRALES,**

Vt potè, ex fatali fumantis Patriæ cinere natos.

Hos ergo in Tuo spargimus Tumulo:

Et Illustrissimos Manes Tuos,

Ex vetusta Maiorum formula

Tuis verius, quàm nostris **FLORIBVS** coronamus.

Si ingenium Tuum benè nouimus,

Nequaquam illos à Tumulo Tuo excludes,

Quæ beneficiorum Tuorum Fructus

Cœlo transcripsisti:

FLORES,

In terris reliquisti.

INSCRI.

INSCRIPTIO I.

Indictio Funeris.

Huc agite Parentales lacrymas,
Quotquot Patriam & Virtutes amatis.
Optimæ Parentis ruinam,
In Filix Fato deplorare.
Inter reliquas Polonix clades,
Hunc etiam Tumulum numerare licet.
Eius quoque, magna pars præsentis funere effertur.
ANNA ALOYSIA CHODKIEVICIA,
Dux in Ostrog,
Palatina Vlnensis,
Magnum Nomen, Clades maxima,
Dum pares magno luctui lacrymas à nobis desperat,
Ab omnium oculis exigit vectigales.
Huc igitur atrata
Amicorum, Clientum, ac Subditorum turmæ.
Pullatis, Illustrissimorum Hospitum, coctibus insertæ,
Augustam Cognati Sanguinis Coronam,
Mistis inter singultus lacrymis irrumpite.
Nec est cur vos tantorum Nominum Maiestas terreat.
Difficile est magnos dolores ordinare,
Calcate securi iacentem.
Quæ se toties ad pauperum pedes abiecit;
Credi potest nunc etiam,
Huc se, ut ab omnibus calcaretur, abiecisse.
Quà quisque proximè potest, Tumulum hunc constipate.
In quo, omnium nostrum grande Depositum, quiescit.
Date lacrymas mortuæ,
Qui tot viux debuistis solatia.
Iusta soluite, quæ debetis.
Æquum non est, ut careat providentiæ fructu,
Princeps nostra.
Quæ nullius lacrymas voluit, viua,
Quò plurimum haberet mortua.
Bene ergo habet.

Hoc primum tibi lacrymarum Tributum pendimus,

Magna Princeps.

Nullum planè maiori titulo debuimus.

Quæ nos toties coëgisti ad gaudia :

Nunc primum ad ingentes cogis dolores.

De omni hominum genere optimè merita;

In hoc solùm in omnes peccasti, quod mortua es.

Seruamus te Gloriæ, quam non possumus Naturæ:

Tempori ereptam; transmittimus Æternitati.

Et quia nobis Tumulus rapit mortuam,

Omnium nostrum pectora exhibebunt viam,

Ita in lacrymis nostris tumulata;

In omnium votis & animis viuas;

Viues funeri tuo, imò & nostris, superstes.

Mors enim omnibus ex natura communis,

Tacitus.

Apud Posteror

Obluione, vel memoriâ distinguitur.

Nemo debet credi omni ex parte sepultus,

Qui in Posterorum grata memoria,

Viuit Superstes.

Animus totus cùm fuerit,

Vix vlla sui parte Fato subiacer.

Nam tempus quod Principum vitæ fata subtrahunt;

Adijciunt ad gloriam.

Tu verò, quisquis luctibus nostris ades;

Caue, ne Principem nostram,

Totam in saxo hoc tumulari arbitreris.

Heroidas nusquam minùs quàm in saxis reperiās.

Illis nulla mundi pars vacat.

Quâdam Diuinæ immensitatis æmulatione,

Coelum replent Animâ;

Terram Famâ.



J N S C R I P T I O II.

Generis Paterni splendor.

Heu!

Quot vnus hic Tumulus Familias capit!
Quanti sub hoc Cinere splendores latitant!

Nimirum, Mortis ingenium hoc est:
Ampla quæq; , in odiosam Epitomen redigentis.

Illustrissima Domina

D. ANNA ALOYSIA

C H O D K I E W I C I A

Dux in Ostrog,

Palatina Vilnensis.

Quidquid Augusta, Ducum Ruffiæ Domus,
Per tot retrò ætates, Patrij splendoris, collegerat,
Sub hunc Tumulum intulit.

Non sibi hic nimium placeat Romana Iunia.

Alex. ab Alex.
lib 3. c. 7.

Eius olim funus,

Viginti Clarissimarum Familiarum Statuæ secutæ sunt :

Nostram Principem,

Tot Cæsarum, tot Regum, & Principum Affinitates,
Ad hunc Tumulum, longâ serie deducunt.

Nequaquam à Funeris huius pompa abesse possunt:
Qui à viuentis animo nunquam abfuerunt.

In ea, quondam vitæ meliori redditi;

Iterum in ea hodie tumulantur.

Huius ergo tantæ Heroinæ,

Si Honorum titulos inquiris? Apices accipe.

Regum Neptis,

Ducum, Heroum, Principum,

Filia, Soror, Amita;

Orientis, & Occidentis, Imperatorum

Affinis:

Tot Serenitates fatali tumulans cinere;

Ducum Tiaras, Regum Coronas,

Augusta Imperatorum Diademata,

In gentilitia Domus suæ Mitra,

Huic Tumulo transcripsit.

Imperatoria Diademata desideras?

Ad Augustam Praxedem Aldeidam,

Georgij Ducis Rossia Filiam,

Henrici Tertij Imperatoris Coniugem:

Ad Annam Romani filiam,

Basilij & Constantini Fratrum,

Orientis Imperatorum Sororem,

Wolodymiri Rossia Ducis Coniugem,

Vtramque Illustrissimæ Palatinæ nostræ Auias,

Mentem animumque porrige;

Et vniuersa Orientis ac Occidentis decora,

In vnica Heroïna,

Imò in exili vrna hac, agnosce.

REGVM Coronas requiris?

Harum etiam, non paruum numerum in puluere hoc reperies,

Toties in Maioribus suis coronata,

In Demetrio Wszewolodo primo Rossorum Rege;

In Daniele Romani Filio bis coronato;

Tot demum Coronis fulsit,

Quot è Rossia Ducibus Reges, ac Reginas Polonia numerauit.

Patrijs Diadematibus, accessere externa,

Bohemica, Vngarica, Gallica, Noruegica,

Illud planè iam ab hinc Fatis agentibus;

Vt omnium virtutum capax animus,

Toties in Maioribus suis coronaretur.

Ast cheu!

Tantæ serenitates in tantillum cinerem abierunt?

Ea nimirum Principum fortuna est,

Oriri vt occidant:

Fulsisse; vt in fatales tenebras abeant.

Nulla est serenitas, cui sua Nox non immineat.

Nulla mortalium Gloria;

Cui suam fata non præscripserint metam.

Vt alia defint, quæ dictis fidem faciant,

Habes ante oculos: imò tuis calcas pedibus,

Irrefragabile asserti nostri argumentum;

Tot Heroum splendores, in hanc fauillam abiçre.

Tot, & tanta Titulorum momenta,

In tantillum desicere NIHIL.

Albert. Staden.
Bertold. apud
Baron. Sæcul.
XI Zonaras.
Herbstein. in
Mosch. ex An-
nal. Rustic.
Miechouita
lib. 2. c. 3.
Broniewski in
Tauric.

Miechouita
lib. 2. cap. 20.
Dlugos.
Strykowski.
Sarnicius.

Baron.
Dubrauius.
Massonius.
Papyrius.
Annal. Franc.
lib. 3.

INSCRI.

INSCRIPTIO III.

Generis Materni splendor.

HOSPES,

Qui Paterni Generis claritudinem,
In cinere hoc sepultam aggemuisti;
Age, Materno etiam Sanguini,
Parentales lacrymas affunde.

Vtriusque Gentis, ex ipsis Illustritatibus, accensus rogos hic est.
Omnium lachrymas litit, vtriusque bibax cinis.

Eâ Matre genitâ, Princeps nostra,
Quam KOSTKARVM & ODROWAZIORVM
Augusta Domus protulit;
Vltra vulgares metas genus suum attollit.

Nimirum,

Magnorum MAZOVIAE DVCEVM,
A PIASTO POLONORVM REGE: deductum trahens sanguinem,

Tot cognatorum Regum Coronas numerat;
Quot à PIASTO ad MAGNVN vsque CASIMIRVM Reges,
In Polonia, & Regnis alijs, imperarunt.

De quo
Paproc. in
Nid.

Et, planè non indignam PIASTO NEPTEM
Principem nostram,

Vt desint alia; suauissimi mores, probauerunt.
Digna fuit, mellea Princeps, eius inter Filias censerî,
Qui Apum prius Magister, quàm Polonorum Rex,
Non magis alienis fauoribus, quàm fauis suis,
Nec Fortunæ magis, quàm Cererî

Piastus à melli-
ficio, ad Re-
gnum vocatus.
Cromer. lib. 2

Regnum debuit.

Sed vltra mortales metas nobis hîc nitendum est.

Parum est PIASTI Neptem fuisse;

Parum est illum habuisse Auum,
Qui in publico Regni totius Comitio,
Dignus Regno iudicatus;

Ioannem Kost-
ka, Palat San-
dom. de quo
Maximil. Fre-
dro in Henric.

Regnare fortassis poterat,

Nisi antiquius esset Regno dignum iudicari,

Quàm regnasse.

Nempe, meriti nomen supra quauis præmia assurgit.

Augustior est gloria dignitatis, quàm Titulus.

C

Adcoque

Adeoqué maius est Imperio non indignum censerī:

Quàm in Regali folio confedisse.

At ne sic quidem non regnavit,

Illustrissimus IOANNES à Stemberg KOSTKA,

Palatinus Sandomiriensis,

Maternus Principis nostræ Auus.

Qui Polono Diademati dignum Regno caput subtraxit:

Tot virtutum Coronis redimitus est.

Satius iudicans, Patriæ commodis prodesse, quàm præesse:

Vltro oblata sibi Serenitatis titulo renuntiavit,

Maiori animo, quàm alter admisisset.

Hoc nimirum erat,

Suarum ac alienarum cupiditatum Regnum tenuisse.

Et summam rerum, deferentibus sibi aliorum suffragijs,

Silentium imperasse.

Taceo alios KOSTKANÆ, & ODROWAZIANÆ domus Titulos.

Vtriusque Familiæ maiestas, vltra coelos protenditur.

Citra cauillum Stoici,

Licet hîc nobis ad Superum Genethlia appellare:

Licet citra Fabularum commenta,

Vtriusque Gentis veram Apotheosin celebrare.

Vtraque Domus, mortales prætergressa terminos;

Ipsa Beatæ Immortalitatis Capitolia obtinet.

Primâ, in S. HYACINTHO ODROWAZIO, cœlis illata;

Alterâ, in B. STANISLAO KOSTKA, dedicata;

Supra omne id quod mortale est assurrexit.

Siue Florem, siue Gemmam, Hyacinthum appelles;

Non magis ille Poloni, quàm Diuini Diadematis, splendorem auxit,

Vtrinque, in Ducalem Principis nostræ Mitram, redundantem.

Inter reliquas Tiaræ illius gemmas;

Hic imprimis Hyacinthus numeretur,

Qui eius pretium maximè auxit, & fulgorem illustravit.

Te verò Beatissime STANISLAE KOSTKA,

Cùm ludens in Orbe terrarum Sapientia,

In diuinas manus accepisset:

Tum demum felicissimè,

Illustri KOSTKA RVM Sanguini,

Adeoqué vniuersæ Poloniæ fausta iacta est,

Nec erat difficile agnoscere

Principem nostram Auunculos habuisse superos;

Quæ tanto in eos animi impetu ferebatur.

Est,

Est, nimirum quædam cognati sanguinis sympathia.
Nec dubium est, quod in eosteneriori affectu feramur;
Quos nobis arctiori vinculo, Natura coniunxit.
Agite ergo, Beatissimi cœli Incolæ,
Illustrissimam Neptem vestram,
In cognatæ Beatitudinis partem admittite.
Par est, ut in qua vestras cum sanguine virtutes agnoscitis:
Eandem vestræ propinquam gloriæ,
Hæredem adsciscatis.

INSCRIPTIO IV. Virtutum splendor:

Nè verecære, tot Titulorum Præiudicium, Hospes.
Adcò illustri Paternorum, Maternorumq; Natalium splendori;
Maior etiam Propriarum virtutum splendor accessit.
Aliàs, nemo in virtutem nostram vixit.

Seneca,

Parum prodest illustris ortus, quem mores infamant.
Canosum laticem, non commendat perspicui fontis claritudo.

Si benè calculum ponimus,
Nobilior est nobilitas virtutis, quàm sanguinis.

Laudabilius multo est,
Moribus gloriari quàm Maioribus.
Meliores Principes parturit virtus, quàm Natura.

Ita Illustrissima Princeps nostra,
Non magis Naturâ, Princeps quàm virtute
In tanta Maiorum suorum luce, nata;
Gentilitia lumina, quæ in cunis inuenerat,
Virtutum luce geminavit.

Tot Regum, & Principum gloriâ nobilis;

Nobilior suâ:

Ita quæsiuit ex moribus claritatem;

Ac si nullam ex Maioribus habuisset.

Dicere de ea poteras:

Natalitium splendorem si non inuenisset, ipsa fecisset.

Ex amplissimis tot Ducum Patrimonijs,

Nil magis ad se pertinere rata, quàm virtutes:

Earum imprimis possessionem inuasit.

Optima enim Hæreditas à Maioribus, posteris relinquitur,

Cicero.

Præclare factorum Gloria.

Quidquid

Quidquid in Gentilitijs eorum fastis, illustre ac magnificum;

Quidquid Sanctum, ac Religiosum;

Viucibus exprimens exemplis:

Quidquid minus gloriosum, ac laudabile;

Illustribus corrigens argumentis:

Natium Domus suæ splendorem,

Ad summum Æternitatis apicem euexit,

Vt pulcherrimus Sol videtur cùm occidit:

Ita & Magna tot Ducum & Principum Domus,

Cùm in Principe nostra occideret,

Visa est Illustrissima.

Nimirum,

Quâ nobilitate genitâ, eâdem viuens;

Qua pietate educatâ, eâdem moriens;

Iniuria in tot Maiorum Titulos sibi fore videbatur,

Nisi eorum magnitudinem, suis virtutibus ampliasset.

Hæc demùm vera Principum gloria,

Non solùm à Maioribus non degenerasse:

Sed eorum etiam præclarè facta, cumulasse.

Compendio dixero omnia.

Illustrissima ANNA ALOYSIA CHODKIEVICIA,

Nobilitatem quam nascendo obtinuerat,

Viuendo, fecit amplissimam;

Immortalem, reddidit moriendo.

Fratrum ac Sororum,

Imò omnium Gentis suæ postrema:

Eorum omnium virtutes,

Quidam veluti Epilogus,

In se collegit.

Arceantur ergo ab hoc funere Præficæ.

Ipsas hîc Virtutes

Præficarum lamentabili munere fungi decet.

Omnes regnârunt in viua;

Omnes lamententur in mortua.

Luctum hâc lege indicit Iustitia,

Vt nullus iam in eo timeatur excessus.

Priuatus enim sæpè cum vitio:

Princeps, semper cum virtute lugetur.

J N S C R I P T I O V.

Orthodoxa Religio.

Te imprimis Atrata ad funus huc adduco
Religio.

Dubium est Patronam amiseris, an alumnam?
Illustrissima ANNA ALOYSIA CHODKIEVICIA,
Ita te coluit, vt Filia Matrem;

Ita vbique fouit, vt Mater Filiam.

Incrementa tua, suismet præferens augmentis:
Felicitem tuam suis redimens Fortunis:

Tum se reputauit felicissimam,

Cum te videret fortunatam.

Eam hæreditariæ sortis portionem nacta;

Quæ Deo & Ecclesiæ rebelles Ciues censuit:

In illud imprimis incubuit,

Vt ditiones suas Deo restitueret:

Imò, ipsum ditionibus suis Deum.

Nimirum prima hæc Principis gloria,

Aut pro Deo agere, aut de Deo.

Errat, quisquis Dei & Principis Imperium distinguit.

Eadem momenta sunt Regionum, & Religionum.

Et vix vlla potest esse florens Regio;

In qua Orthodoxa non floreat Religio.

Extot Regnorum quæ ruinis, quæ incrementis didicimus:

Tum demum firma esse Humana Imperia,

Cum diuinis Imperijs vnita sunt.

Ne igitur, tot inter turbulenti Schismatis procellas,

Fortunarum suarum magna Nauis, fluctuaret;

Sacram Fidei anchoram, vbique Religiosa iecit.

Felix, si in quorum fortunas imperium habuerat,

Eorum animis imperare potuisset.

Et quia difficilis erat tot inter scopulos nauigatio:

Ne in odiosas cautes incideret,

Cautissimè vtrumque declinauit extremum.

Ita Schismati irata,

Vt tamen eius Sectatores amaret tenerrimè:

Non potuit in magno eos non habuisse pretio,

Quorum animas, omnino lucrari Deo studuisset.

Ergo salutis alienæ non immemor,

Vbi videri potuerat tantummodò memor suæ:

Tot Apostolicis excursionibus fundatis,

Videbatur planè, cæcæ Fidei facem accendisse:

Aut ipsamet, eam ad subditorum suorum mapalia,

Suâ manu duxisse.

Nullis parcens sumptibus,

Vt omnem ditionem suam cœlo faceret vectigalem;

Iosuano planè prodigio,

Nouum ab Occidente Solem,

In Orientem reducere satagebat.

Citra impij Caligulæ enorme votum,

Illa quoque, vnicam tot subditis suis vouebat ceruicem:

Vt eam facilius, Orthodoxæ Fidei iugo submitteret.

Sed nimirum, seruiles ceruices,

Suaue Christi iugum subire recusarunt.

Multorum capitum Schismatica Bellua,

Collum citius frangat, quàm flectat.

Habuiisti nouam planè Dambrowkam Polonia,

Si in eius tempora incidisset.

Meritò hæc quoque, vt olim illa,

Cromerus.

Triumphali ferro coronata incessisset;

Quæ in tot amplissimæ ditionis partibus,

Per sustentatos suis sumptibus animarum victores,

Omnem impietatem triumphasset.

Quippe Dei & Ecclesiæ hostibus,

Longè infensior quàm suis;

Nullum propè sibi inimicum fuisse credidit,

Nisi prius Deo hostis extitisset.

Honori Diuino, ita subijciens suum:

Vt tum demum contemni se, cùm ille temneretur;

Tum vel maximè se honorari existimaret;

Cùm ille ab omnibus coleretur.

Atque hinc discite quot quot estis Principes:

Verâ ac Orthodoxâ religione,

Nullum magis firmum esse Familiarum columen,

Hæc sola magnas Principum Domos, stabilit vel euerit,

Stabilit, procurata:

Euertit, contempta.

INSCRI-

INSCRIPTIO VI.

Fortitudo Heroica.

Quæsieris olim Mulierem fortem,
Regum sapientissime.

Prouerb. 31.

Non est cur amplius pretium eius, ab vltimis finibus inquiras:

In hoc eam inuenies cinere.

ANNA ALOYSIA CHODKIEVICIA,

Inuicta Ducum in Ostrog Soboles,

Palatina Vlnensis,

Martis planè Poloni Bellona,

Id est Magni Exercituum Ducis,

Magni Moschorum, Suecorum, Turcarum Victoris,

Non thori magis, quàm Heroicarum virtutum consors,

Videtur planè viriles mariti sui, hausisse animos.

Ita in omnes Fortunæ impetus obfirmata;

Ita vbique Fortis, vbique Constans:

Vt nulli planè, Fatorum telo crederetur obnoxia.

Inter tot Bellorum, ac infortuniorum tempestates;

Tanta illi fuit de sublimitate serenitas:

Vt erectissimam inuictæ Heroinæ mentem,

Iure optimo Montem illum appellares:

Olympum de
quo Plinius
& alij.

Qui proceritate suâ nebulas omnes eluctatus,

Perpetuâ serenitate conspicuus est:

Et non fuerit hætenus inter Matronarum laudes

Constantia, computata.

Hodie iam inter eas censerì debet:

Quia Princeps nostra non tam nomine quàm re,

Ipsa Constantia fuit.

Faceessant Constantes & Constantini:

Abscedant, rarò nominis sui mensuram implentes, Constantiæ.

Felicius ista tituli huius Etymon expressit.

Quàm multi Constantini,

Inter Auos ac Proauos eius numerentur;

Melius ex eius moribus, quàm ex Historijs didicimus.

Tot Heroibus, solo dissimilis sexu;

Quot illi inter viros, illa inter fæminas fuit.

Omni horâ, ausa prouocare Fortunam;

Ita omnes illius conatus contempsit;

Ac si illis minimè obnoxia fuisset.

Maior animus, quam vt à Fatorum leuitate posset circumagi:

Cùm

Cùm circa eum omnia mouerentur; semper immotus;
Multas cùm passus sit, nullas sentire videbatur angustias.

Altitudo tanta,

Quæ infra se agebantur, ne sensit quidem.
Communi totius Patriæ fato, bonis omnibus exuta:
Ita omnium iacturam tulit, ac si optasset.

Gratias tibi Fortuna,

Sæpè magis propitia, cum parcis minus.
Cum maximè irata sæuisti:
Tum maximè in Principis nostræ laudem laborasti.
Poterat quispiam de eius animi Fortitudine dubitare:
Tu hunc omnibus scrupulum exemisti.

Quàm omnes circumdabant Gratia;
Felix videri poterat, non fortis.
Facile nimirum est inter prospera stare.
Inter aduersa, etiam non cadere, prodigium est.
At verò inuictus Principis nostræ animus,
Etiam tot inter ruinas erectus stetit.

Stetit verò tantummodo!

Imò ab ipsis ruinis altius euectus,
Tum, si alias vspiam, se suaque despexit.
Tot Fortunarum ruinae, gradus fuere ad cælum.
Caue tamen ne tot inter infortunia infelicem dixeris.
Bene constitutus animus, etiam inter aduersa, felix est.
Vt plerique in Magnarum Fortunarum medio, miser;
Ita alij, inter infortunia censentur fortunati.

Res intima foelicitas est.

Nihil extraneum respicit.

Egregia Principis virtus, etiam sine Fortuna felix est.

Ita tum Princeps nostra,
Omnibus fortunæ machinis impetita, non fracta:
Cùm se vbique integram circumferret,
Ipsa sibi, vbique suffecit.

Cùm se antequam pelleretur, putaret exulem:

Ita Possessionum iacturam tulit ac si optasset:

Sua omnia ita reliquit; ac si aliena tenuisset.

Denique ubiq; fortis, non item ubiq; felix:

Hoc ipso nobilitata est capite;

Quòd in ipsius rectè factis,

Virtuti debentur omnia; Fortunæ nihil.

INSCRIPTIO VII.

Amor Iustitiæ.

Ne tu quidem à Monumento hoc abesse possis
Regum & Principum ingens Munimentum
Iustitia.

Dum Iusta, Iustissimæ Principi exoluimus,
Ipsam plorare decet Iustitiam.

Hæc quoq;

(Aliàs in Matronarum laudibus rarissima)
In Principe nostra viriles animos conspicata;

In additissimis omni Æquitati manibus,
Hactenus viris ipsis creditam,

Et Libram deposuit, & Gladium.

Ille verò, nulli Heroum impar Heroïna,

Ad ipsius Iustitiæ normam, utrâq; vsâ:

Æquissimè Stateram librauit, & vibrauit gladium.

Et Libra quidem sæpius vsa,

Gladio etiam semel vti debuit.

Nempe, parricidalis seditiosi Schismatis ferro impetita;

Ferrum vel inuita, stringere debuit Princeps aurea.

Armatam Rebellionem, ne sæpius timere cogeretur,

Semel terrere debuit.

Nec corruptit lenitatis gloriam, moderata puniendi seueritas.

Bonis nocet, qui parcit malis.

Senec.

Tam omnibus ignoscere crudelitas, quàm nulli.

Et aliquando, venia supplicio crudelior est.

Venenata Schismaticæ rebellionis Hydra,

Vt illa Herculeæ,

Facile repullulat, ni facem sentiat, & gladium.

Vbi tanta in Principes scelera, regnum obtinent,

Pusilli animi est inconsulta Clementia.

Quos flectere non potuit, plectere omnino debuit,

Princeps nostra.

Magnam vel inde laudem merita,

Quod priuatis damnis, publicam securitatem redimeret:

Atque ita affectus suos moderaretur;

E

Vt neque

Vt neque multâ asperitate, subditorum animi exulcerarentur:

Neque nimîâ lenitate, inolescèrent.

Sanè, id ex ipsius Politiei præscripto.

Bonorum Principum est,

Non tam delicta velle punire, quam tollere.

Ne, aut acriter vindicando, æstimentur nimij:

Aut leniter agendo, putentur improvidi.

Aliàs non minus remissa in pænis,

Quam profusa in præmijs:

Bene semper beneficia collocavit;

Nec male supplicia.

Fuerit hæc olim Augusti gloria,

Nostra quoq; Princeps, magnis in eam passibus immigravit;

Quod nullum vellet viuere,

Aut impunè malum, aut gratis bonum.

Denique, quia primus florentis Iustitiæ flos est,

Reddere unicuiq; quod suum est,

Suum unicuique ius, pleno iure, seruare assueta;

In ipsam quoque Mortem, minus æqua videri noluit.

Mutuò sibi datam vitæ vsuram sciens;

Vltra Principum consuetudinem,

Hilari vultu, supremum exoluens debitum

Morti quoque;

Immo Deo, ac Æternitati

Reddidit quod suum est.

Si Pietate & Iustitiâ, homines Dij fiunt:

Quantam tibi, Princeps æquissima, Apotheosin debemus?

Si te effati istius auctôr Octavianus vidisset,

Vt Deam coluisset.

Sed quia Mortalitatæ tuæ non immemor,

Diuiños auersaris honores;


Immortalitatæ tuæ secura,

Mortales interim à nobis accipe.

Abi viator & disce.

Non frustra Iustitiam muliebri habitu pingi:

Quæ etiam in foeminis, tantum regnum obtinet.



INSCRIPTIO VIII.

Clementia in Subditos.

Iustitiam, Solem Regnorum, appellauit quispiam.

Lipius Po-
lit. l. 2. c. 12.

Clementiam, Lunam Imperiorum.

Bene est, asserti huius ingens Argumentum,

In hoc etiam funere inuenit.

Ad illius Principis tumulum stamus;

Apud quam vtriusque virtutis flos, domesticus fuit.

Ducalem pro gentilitio stemmate Lunam præferens;

Vium Clementiæ Symbolum.

Non minus in se expressit, quam in Stemmate.

Si vspiam alibi, hic certè,

Nunquam Luna hæc Eclipsim passa;

Nunquam non plena fuit.

Etsi aliquando Soli Iustitiæ, visa est opposita:

Ita tamen, perstringentes illius radios in se collegit;

Vt umbrâ suâ, eos temperaret, non extingueret.

Nimirum ANNA ALOYSIA,

Præceps nostra,

Vtriusque Nominis sui Fœmina fuit.

Gratiosam ANNÆ clementiam,

Cognato ALOYSIANI acoris Aloë, ita in se miscuit:

Vt nec Clementia, omnino remissa;

Nec Iustitia nimium foret aspera.

Vis rem clarius loquar?

Supra omnium Fœminarum Naturam,

Et ultra multorum virorum gloriam;

Ita Iustitiæ Clementiam fecit Affinem;

Vt neque illius rigor nimius, huius lenitati:

Neque huius facilitas, illius præiudicaret Æquitati.

Magnum hoc est in Principe:

In Fœmina, etiam Prodigium est.

Quia tamen Princeps nostra,

Multorum Heroum animos prætergressa,

Media vbique incessit semita:

Pulcherrimè, vtriusque virtutis, euasit extremum.

Parricidali, Rebellium subditorum, ferro impetita,

Ingens incendium, parcissimo restinxit sanguine.

Semel

Semel feuera, ne semper esse cogeretur.
Tantilla tamen feueritas Clementia potius dicenda est.
Quippe, trium exitio, cæteros admonens Maiestatis:
Quibus nullo modo, bonam indere animam potuit,
Malam ademit.

Tam enim omnibus ignoscere crudelitas, quam nulli.
Reliquos cum perire meruissent, feruare maluit.
Hoc enim magis Ducale & propius Diuinitati est.

Seneca

Vt medicum multa funera,
Ita Principem multa supplicia infamant.
Vilissimi etiam sanguinis parsimonia,
Magnam Principibus laudem conciliant.

Tacitus

Fallitur quisquis nimia feueritate,
Maiestati auctoritatem posse conciliari existimat.
Nullâ re magis vulgarem, staturam excedunt Principes;

Quam Humanitate & Clementia.

Magis miranda sunt fulmina vbi seruant,

Quam vbi sæuiunt.

Tyranni vox illa fuit non Principis,

Belluæ non Hominis.

A 12 Oderint dum metuant.

Bonus Princeps illud maximè timet, ne timeatur:

Etiâ illorum, quos punit amores emeritus.

Et implenerit tum Clementissima Princeps

Magnum, Optimi Principis Nomen.

At verò, tum etiam, turbulentum Schisma ostendit,

Quid ab eo toti Reipublicæ timendum fuerat.

Tanta in Principem innocentissimam tempestate excitata;

Iam tunc præsentis perfidiæ ac Rebellionis

Quoddam veluti rudimentum dedit.

Et non inane, audendi periculum fecit.

Quia tamen lenissima Princeps,

Ad veniam promptior fuit, quam ad poenam:

Cum placata esse non posset sceleribus;

Adhuc esse mitis voluit sceleratis.

Æque parata donare beneficia,

Ac maleficia condonare;

Dum singulorum declinat inuidias;

Dum omnium gratias demeretur;

Mirum erat, nisi omnium sibi amores conciliaret.

Iniurias, eo æquius tolerans; quo iniquius inferrentur:

Celliorem se fecit.

Quam vt ad eam popularia tela pertingerent.

Nullius iniuriæ memor, nisi vt condonaret;

Ad solus Clementiæ suæ Tribunal;

Omnes offensionum causas retulit.

Alias tenerimum Principes sensum habent.

Vt Elephantos, ita plerosque purpura feros facit.

INSCRI-

INSCRIPTIO IX.

Prudentia.

Heu! quot in vnus Principis tumulo clades,
Non tantum Fortunarum, sed etiam Virtutum!
In ANNA ALOYSIA CHODKIEVICIA,
Virtutes aliæ Principem,
Prudentia, etiam Magistram amisit, ac Ducem.
Vt illa sit aduersus aduersa omnia maximè obfirmata;
Abstineretamen hîc à lacrymis nequaquam potest,
Vbi ipsamet propè, luctuosum cadauer effertur.
Fatalem prudentissimæ Principis iacturam,
Stupor sine lacrymis pertulerit, non Prudentia.
Neque hæc per Encomiasticam Hyperbolen dicta putaueris.
In Principis nostræ laudibus, nulla Hyperbole locum habet.

Liceat à disertissimo in Purpura Oratore,
Dicat Amalusinthæ laudes, in Principem nostram deriuare.
Satiùs de hac, quàm olim de illa dixerit ille;

Cassiodor.
lib 5 Var.
Or. 9.

Si Prudentiam quæris? hæc fuit,
Si Fortitudinem? nulli cessit;
Consilio optima: Ratione ubique victrix,

*Plenum ipsa secum Senatum circumferens:
Non puduit unquam nec penituit viros exequi,
Quod illa, Magnæ mentis Fœmina, censuisset.*

Miraris tot vnus Heroinæ laudes? omnes sibi Princeps nostra vendicat.
Prior illa, nostræ huius quoddam veluti Prototypon fuit.

Ipsa sibi in plerisque Consul: ipsa Senatus!
Quoties se in Concilium suum admisisset,

Errauit nunquam.

Ex altissima erectæ mentis specula,
Ita Temporum omnium vicissitudines præ oculis habuit,
Ita Præteritorum memoriâ, Præsentia disposuit;
Ac si Futura etiam, solerter præuidisset.

Bifronte Iano circumspectior,
Centoculo Argo oculatior,

Vterque est
Prudentiæ
Symbolū.

Ita se suaque omnia circumspexit:
Veluti omnia temporum ac ætatum discrimina,
Capaci non minus animo, quàm pupillâ fuisset complexa.
Infallibilis Oraculorum eius veritas

Iam in plerisque euoluitur.
Fieri iam debere quæ illa prædixerat, non diffitemur;

Quia iam plurima, ex prædictionum eius formula, geruntur.

Adeò vt æmula planè Annæ Phanuelis filia videatur, De qua Luc,
c. 2, v. 37.

Cuius non ipsum tantummodò nomen,

Sed etiam, annexam, integerrimæ viduitati, Prophetiam,

Ad viuum expresserit.

Inest nimirum Principum effatis, quædam Oraculorum auctoritas:

Est quidam entheus in magnis mentibus spiritus.

Hoc afflati Principes, futura, præsentium more, disponunt;

Quædam Prudentiæ ac Prouidentiæ Prophetiâ.

Heu! talem hodie Principem comploramus.

Quædam veluti ingeniorum ac consiliorum Pandora,

Omnes Prudentiæ numeros ita in promptu habuit:

Vt, aut multorum virorum ingenia deuorasse;

Aut Maiorum suorum, Senatorium, Ducalemque genium,

Capacissimo pectore complexa esse videretur.

Aliàs non omnino frequens spectaculum est,

Vt vna ceruix, plura maturioris Iudicij, ingenia circumferat.

Rarum hoc in viris, rarissimum in Fæminis.

Quæ vt plurimum passionum impetu, in deuia abreptæ,

Consilia nec dare possunt bona, nec accipere.

At verò nostra hæc Heroïna,

A consultissima Bonæ mentis Curia,

Omne Passionum & Affectuum vulgus submouens;

Soli Rationi & Fasces tradidit & secures.

Tam consulere alijs prompta, quàm alienis parere consilij expedita:

Pertinacem Fæminarum genium, correxit de suo.

Prudentissima dissimulatione in plerisque vsa:

Magnum suffragium adiecit Politico asserenti,

Expedire Principem scire omnia, non omnia exequi.

Aliàs nimium cauti, incidunt in cautes.

Et dum falli timent, fallere docent.

Iactet ergo vetus Roma suas Ægerias,

Prudentissimi Numæ Pompilij Consultrices:

Caria Arthemisias, Xerxis Oracula, celebret;

Imperiorum, ac Imperatorum Magistras, Pulcherias, Oriens;

Occidens, Liuias prædicet & Drusillas:

Princeps nostra, omnium encomia

Insignis Prudentiæ, laude, aut superauit, aut æquauit.

Fuerit Iulia Mammea Alexandri mater,

Cuius ille nutu Orbis terrarum Imperium prudentissimè rexit,

Magnâ consiliorum vi celeberrima.

Ne huic quidem herbam, Princeps nostra, porriget.

Alexandri & illa fuit, non Mater sed Filia.

Tacit.


Liuius lib. 1.

Herodot. 1, 8.

Baron.

Plutarch.

Vofater.
lib. 16.



INSGRI.

INSCRIPTIO X.

Temperantia, & vitæ Austeritas.

Frustra es hic cum parentali Cupresso, Hospes.
Lauros etiam, & Palmas Floribus nostris adnecte.

ANNA ALOYSIA CHODKIEWICIA.

Generosissima sui victrix,

Vbi se sibi, Duce Temperantiâ, subiecisset:
Post tot de se relatas victorias, & triumphos,

Triumphalem Laurum à te exigit.

Nimirum, Bellicosissimorum Maiorum

Filia, Neptis, Nurus.

Postquam Marti Polono nupsisset;

Martialem gentis suæ genium, armis Maritalibus ita iunxit;

Vt perpetuum sibi ipsi bellum indixerit.

Noua planè Seculi nostri Amazon,

Cùm, è recentioris Æui norma, configere cum hostibus non posset:

De se ipsa, grande sibi Trophaum erexit.

Humanis implicita, Diuina non deferens;

Religiosior in Palatio, quam alij in Asceterio:

Se vnam semper persecuta,

Sibi vni, implacabili odio, fuit infensa.

Adcò, vt nec lacrymis sibi potuerit conciliari, nec sanguine.

Quà Cilicijs in se armata, quà flagellis,

Dubites, suâne magis, an Ducali Purpurâ nobilius fulserit?

Cum ei suum toties affudisset sanguinem

Fecit eam dibapham, ac planè bis tinctam.

Sui vbiqûe seuerissima Exactrix:

Visa est ita omnem in alios expendisse lenitatem;

Vt solos sibi reseruaret rigores.

ALOYSIA, amarum alijs ac insuaue Nomen:

Cuius tamen rigidam asperitatem,

Nemo magis, præter ipsam, expertus sit.

Si vtriusqûe Nominis eius Etymologiam discutias;

Afferere omnino debebis,

Principem nostram.

ANNAM extitisse alijs; ALOYSIAM ipsi sibi.

Nullius magis Domina, quam Corporis sui:

Ita Dominium sui Regnis omnibus prætulit;

Vt cupiditatibus, nec coacta sit seruire suis;

Nec vnquam voluerit alienis.

Nempe, pulchrum est Imperantem alijs, Imperium sui tenuisse.

Turpe est, extra se Principem; intra se Seruum esse.

Gemi-

Gemina fame Deum honorans:

Alterâ, quam in corpore, frequentibus ieiunijs aleret;

Alterâ, quam in animo, pijs commentationibus nutriret:

Ipsis tantummodo Abstinentijs potuit saturari.

Esurierit suas inter epulas Tantalus:

Illius tormentum, Princeps nostra, felicius est imitata.

Inter Ducalium Mensarum opulentiam ita versata est;

Vt integerrimam illi soli famem reservaret,

Qui vnicus famescientis animæ Cibus erat.

Ita omnibus voluptatibus, offensus animus;

Turpius odio, sæpe nec honestas admisit.

Illâ tantum voluptate contentus, quæ ex rectè factis percipitur;

Aliam omnem, ademptam Tempori,

Immolauit Æternitati,

Peccata detestata vbi erant: verita vbi non erant;

Cùm in se certa punire nequiverit, puniuit dubia.

Imò &, persæpè grauissimè, in se, torfit aliena.

Et quia mirum erat, si adeò ingens Animus,

Sine multarum ægritudinum angustijs in corpore habitaret:

Ex frequentibus, quibus vrgebatur morbis,

Patientiæ, (quæ genuina Temperantiæ proles est)

Vberem sibi offerri messem est gratulata.

Quò corpore imbecillior, eò Animo fortior:

In frequentissimo magnarum Ægritudinum Gymnasio,

Ad vsq; vitæ ipsius, contemptum profecit.

Tot Morbos, quotidianos veluti mortis monitores,

Eò tulit æquius; quò ad Immortalitatem anhelaret ardentius.

Assiduum tot Infirmitatum Exercitium,

Mirum erat, nisi in Artem Bene moriendi transfret.

Et miretur quispiam, in mortis amplexum vltro iuisse.

Quæ omnem eius supellectilem in delicijs habuit.

Diceres, vt semel benè ac suauiter moreretur,

Didicit sapius per partes mori.

Tandem quam vitæ fatigabant virtutes;


Eandem, morborum vitia, quæ sola corrigere non potuit,

Minimè repugnantem, ac panè volentem, peremerunt.

Discite hinc Mortales, Geminò Temperantiæ & Patientiæ magisterio.

Vt semel bene moriamini, Sæpe mori.

Hic etiam Habitus, ex Actuum frequentatione nascitur.



INSCRIPTIO XI.

Liberalitas in communi.

Abeſte ab hoc funere Parcæ,
Liberaliſſimam Principem tumulamus.

Adeſte Liberales Gratiaë,

Vnam ex vobis; aut vos omnes in vna;

Fatali hodie tumulo inferimus.

ſiue nominis Etymon, ſiue animum ſpectes:

Etiam ANNA ALOYSIA CHODKIEVICIA,

Vna Gratiarum fuit.

Anna quæ
Gratiam
ſonat.

Iure omnium Gratiarum nomine inſignita,

Cui omne hominum genus tot debet gratias.

In hoc imprimis ſe Principem ſibi gratulata;

Quod è ſublimi magnæ Fortunæ ſpectula,

Melius aliena ſpectaret incommoda:

Videbatur toties accipere beneficium,

Quoties rogaretur conferre.

Diuitias bene collocare melior, quàm augere:

Tum demum ſe diſſimam, ac feliciffimam credidit;

Cùm in plures beneficia effuſiſſet.

Id eſt: diuites æquè, ac felices, quam plurimos effeciſſet.

Nimirum maior Principum felicitas,

Felices facere; quàm eſſe felices.

Adeoquæ maior diuitiarum magnificentia,

Ditare alios, quàm diuitem eſſe.

Habeat eſſati ſui veniam Stoicus, aut poſtulet.

Errat, inquit, qui exiſtimat rem eſſe facilem donare.

Seneca,

Imo verò tu erraſſe videris Philoſophe,

Si rigidam Philoſophiæ tuæ gnomen,

Ad omne hominum genus extendiſti.

Quod alicui à natura inditum eſt, nequit eſſe difficile.

Quid autem magis naturale eſt Principibus,

Quàm donare?

Et fuerint olim ſordidæ Parſimoniæ mancipati Vitellij:

Sueton.

Principi noſtræ nihil facilius fuit; quàm largiri.

Nihil difficilius;

Quàm aut negare: aut non vltrò beneficium conferre.

Poterat in ea Liberalitas videri Natura non virtus.

Sit ſanè, ex eiufdem Stoici ſenſu,

G

Maior

Maiores aliquibus lucta, cum avaritia, quam cum hoste:

Princeps nostra,

Vt ab omni Bellorum strepitu abhorruit;

Ita certabat beneficijs:

Vt illi nulla gratior euenire victoria potuerit,

Quàm quæ beneficijs parta esset.

Ita nimirum res habet.

Turpius est Principem beneficijs vinci, quàm armis.

Non maior est qui ferro hostes,

Quam qui auro amicos vincere nouit.

Addebat beneficijs pondus spontanea liberalitas.

Illius enim munificentia digna est,

Apud quem, citius beneficium inuenitur

Quàm quæri potest.

Quod multis precibus ægrè extorquetur,

Beneficij nomen vix meruit.

Quia caro venditum; nimis caro emptum est.

Bouem in Nummis pinxerint alij:

Quibus æquè graue fuit, ex arca Nummum tollere;

Quam olim Miloni Crotoniatæ, bouem succollare.

Alij Testudinem, in aurea, argenteaque moneta expresserint:

Apud quos, difficile est, & nimis tardum, quidpiam dare.

Apud Principem nostram, pecunia,

Non minus rotunda fuit, quàm alata.

Vt potè quæ non testudineo passu incederet:

Sed in quorumuis vota, facile se circumageret:

Imò vltro in egentium manus inuolaret.

Illud maxime in sua amans Fortuna;

Quod prodesse non solum miseris, sed etiam felicibus posset:

Nunquam satiari potuit beneficijs;

Nunquam, alienis precibus, fatigari.


Atque hinc disce Viator, *usum* simul Fortunæ & *fructum*.

Ille Fortunâ suâ optimè vtitur,

Qui eam quàm plurimis secum facit communem.

Vt enim maximum est, fortunam tenuisse præ alijs:

Ita optimum, deriuare in alios.



INSCRIPTIO XII.

Profusa in Deum & Coelites Liberalitas.

Vos quoque ad funeris huius luctum,
Pertinetis Superi.

Eam parentali luctu efferimus,
Quæ tot in homines beneficia contulisse non contenta;
In ipsos quoq; Coelites esse voluit liberalis.

Fuerit Artaxerxes Longimanus appellatus;
Nouimus & longas Regibus esse manus;
Nostræ tamen Principis fuere exporrectissimæ:

Plutarchus

Ovidius,

Quæ liberalibus donarijs onustæ,
Ad ipsius Numinis sedem extendebantur.
Hinc illa Sacrorum Maiestas procurata:

Hinc tot Tempia, & Sacraia,

Dotata, ditata, ad erecta:

Hinc pretiosa Ecclesiarum supellex;
Adeoque mundus omnis Ducalis, Aris impensus,
Id est, Mundi totius factori, immolatus.

Religiosissima Princeps,

Tum se maximè cultam existimauit:

Cum omnem cultus sui pompam,

Diuino cultui dedicasset.

Vectigalem se Deo sciens,

Tributa sua, ornandis eius templis impendit.

Æquè religiosa, cum Schismaticorum Aras euerteret;

Atque cum Orthodoxæ Fidei erigeret:

Omnem ab eis pauperiem arcere voluit.

In Templis non minus religiosa, quam frequens:

Visa est eorum instaurationi,

Magis etiam profuisse moribus, quam sumptibus.

Quoties supplex ad Aras Diuorum accederet;

Illuc videri potuit ex Asceterio, non ex aula, venisse.

Nullibi magis, quam in Diuino cultu exquisita:

Nullibi magis, quam in sacrorum impensis, Magnifica:

Quidquid alij Principes,

Ex sumptuosa Palatiorum maiestate, quasierant:

Totum id longè felicius,

In Diuinorum instauratione, inuenit.

Erigant ergo alij immortales Honori suo Colossos.

Tu Princeps, post hominum memoriam, Religiosissima,

Diui-

Diuino cultui propagando impensa
 Augustiora Nomini tuo Trophæa erexisti.
 Certauerit cum Munificentia tua, hostilis immanitas;
 Et quæ tu cœlo admoueras, solo æquauerit:
 Illâ ipsâ hostili flammâ, Religio tua illustrata;
 Iphis illis ruinis, tui Nominis immortalitas suffulta est.
 Quot in ruderibus illis numeramus lapides;
 Tot facundos speramus Memnones,
 Qui te subsecuturæ Posteritati loquantur.
 Licebit vel ex ruinis metiri,
 Quanta fuerit beneficentiæ tuæ magnitudo.
 Neque enim magnæ molis, parua ruina:
 Neque ingens ruina, exilis casæ, indicium est.
 Apage hinc fabulosa antiquitas.
 Si magnificâ Templorum erectione,
 Superi in terras euocantur:
 Nostræ illud Principis Elogium, nostræ artificium est.
 Facebat illius vetus fabula,
 Diuos omnes catenâ aureâ,
 In terras è cœlo detrahentis.
 Iisdem & illa vinculis, felicius vsa,
 Tot Cœlites Ditionum suarum inquilinos effecit.
 Maecte hâc tua pietate Princeps.
 Extruant alij sublimes in Patriæ tutelam muros:
 Tu optimum ei prouisura Munimentum;
 Tot Cœlitum Aras extruxisti.
 Pro Focis Patriæ pugnent alij:
 Tu quam à Campo Martiali sexus exclusit,
 Diuorum Aras tuendas suscepisti:
 Pro illarum integritate, ferro & armis illi:
 Tu contra Temporum iniurias,
 Auro & liberalibus impensis decertasti animosius.
 Nescio an cum veritatis suffragio,
 Ex lateritia Marmoream se fecisse Romam
 Gloriatu est Augustus.
 Penes illum gloria, te penes facti veritas stetit,
 Quæ extremam Sacrorum pauperiem;
 Id est luteas, aut ligneas, pauperrimæ Religionis casâs,
 Non solum Marmoreas;
 Sed Aureas planè effecisti.

Luciani,

Sueton.

INSCRIPTIO XIII.

Pietas in Parentes.

Eximiae in Illustrissimos Parentes Pietatis,
Hoc primum specimen esto;
Quod vtriusque mores, ad viuum exprimens,
Suprema planè Heres fuerit;
Et Magnanimitatis Paternæ, & Maternæ Pietatis.
Patre Alexandro, Palatino Völhyniæ nata;
Poterat illum Alexandrum fecisse, nisi iam fuisset.
Ita vbique Heroicam mentis generositatem est professa;
Vt planè Alexandro Patre genita, crederetur.
Si vspiam alibi, hic asserti sui fidem Philosophus inuenit,
Cum patrissare filias edixisset.
Vt desint alia, quæ viri illius magnitudinem commendant,
Hæc ipsa minima natu filia,
Illum, Magnum omninò Alexandrum fuisse ostendit.
Vnum tantum erat, quod in tantò Heroe amare non poterat;
Addictus nimirum Græco Schismati animus.
In hoc illa vnico à Patre pulcherrimè degenerauit.
Vel eo ipso Schismati maximè infensa;
Quod illud nec omnino odisse poterat, nec amare.
Mancipatos Orthodoxæ fidei affectus,
Tandem rerum potita, in peruersum dogma;
Laxatis omnium impedimentorum repagulis, effudit.
Et quia Illustrissimus Parens,
Eiuratum in supremo agone Schisma,
Testibus poenitentis animi lacrymis eluit;
Ne augusti cadaueris sepultura,
Profanum Græcæ Religionis delubrum
Suis fulciret cineribus;
Sui etiam capitis præsentissimo periculo, effecit.
Id est, Paternis Manibus, patronas manus porrigens;
Ducali Cadaueri,
Vltra funebrem Cupressum,
Etiam relatas à rebeli plebe palmas, adiecit.
Desinat ergo suos Troia iactare Æneās.
Princeps nostra,
Omnes Heroum laudes, capaci pectore complexa
Antiquam Troiani Æneæ, seu fabulam, seu Historiam
Virili planè innouauit exemplo.
Illustrissimum Parentem suum,

Aristotel.

Ostrogij.

Quem superstitem non poterat;
Eundem post fata, è fatali incendio extulit.
Id est, è Schismatica humo erutum,
(Ne profana tellus ossibus eius grauis foret)

Sanctiori tumulto intulit.

Ieroslauiæ

Ita in Paternos cineres pientissima;
Etiam Maternæ Pietati suam vbique adiecit.

A N N A planè ab A N N A genita;

Id est, Gratiæ Matris, gratiosissima Filia.

Sed quia Nominis & Sanguinis Materni gloria,
Capacissimum pectus non satis impleuerat:

Vtriusque Hæreditati, Maternas etiam virtutes adiunxit.

Quidquid in causa Religionis ausa fuerat;

Imitari non contenta, æmulari etiam voluit.

Eius liberalissimæ Pietati, vbique suffragata, de sua:

Ne cum illa beneficia eius mortua viderentur,

Suis animauit impensis.

Eius fauores suis prosecuta:

Eius vota & desideria, ita vbique impleuit;

Vt absens etiam, à suis desiderari vix posset.

Cuius cum Nomine, omnes planè virtutes,

In Principe nostra essent superstites;

Quidni illa, etiam post funera, vixisse dicatur?

Et alteram se, in tanta filia genuisse?

Fuerit ergo hæc olim fabula,

Senio confectum Æonem à filia sua

In viridem iuventam recoctum:

Ouid in Me-
tamorph.

Fabulam hanc, Princeps nostra, Historiam fecit.

Vtriusque Parentis posthumos cineres,

Ita suis animauit exemplis;

Vt non minùs ante, quàm post funera,

Viuerè superstites viderentur.


Quisquis es Viator, caue.

Ne illi per te, aut in te mori videantur,

Qui tuam tibi contulerunt vitam.

Digni sunt, vt tuo beneficio semper viuant,

Qui vt aliquando viueres; effecerunt.



INSCRIPTIO XIV.

Amor Maritalis.

Conuolate ad funus hoc, CHODKIEWICII Gryphes.

Aurum alicubi fabulosi excubitores custodistis:

Plinius.

In Cinere Isto

Omni auro pretiosiores Amorem inuenietis:

Cuius sacer ignis, sub cinere hoc, viuit adhuc.

Tu quoque Illustrum connubiorum auspex Hymen,

Absesse à tumulo isto, nequaquam potes.

Tot mortualis pompæ luminaribus,

Tua etiam fax debetur.

Nunquam illa clarius micuit,

Quam à tot Illustritatibus aucta.

Merito hîc tecum sepulchrali tæda sistam;

Quandoquidem tantæ domus non diuturnus hospes,

Maritalem facem, in Martialem tædam commutasti.

Illustrissimus CAROLVS CHODKIEWICZ,

Ne annuus quidem Principis nostræ Maritus;

Moschouiticis, Liuonicis, Sueticis victorijs,

Nouam ex Orientis Imperatore Laurum additurus:

Maritalem, Ducalis Fessenninæ tædam,

In Martiales, Bellonæ, faces adulescenti

Dispice ergo tecum maturè Polonia;

Quantum tumulo huic debeas.

Parum est tumbam hanc funebri Cupresso coronasse:

Palmas etiam, & Lauros illi debes.

Nisi aut immemor, aut omnino ingrata sis;

Magnam illam Chocimensis Victoriæ partem,

Huic tumulo acceptam referes.

Nescio, an in eam quispiam plura contulerit?

Certè Principi nostræ, magnis stetit impensis.

Extinxisti veterum Amazonum gloriam, Princeps Illustrissima:

Aut virtutem illarum, tuâ illustrasti.

Illustrissimum Maritum tuum, in Martialem arenam,

Non tam pedibus, quam mille affectibus comitata;

Dammis tuis, totius Patriæ commoda,

Imò totius Christianitatis incolumitatem, redemisti:

Orbitas tuâ, totius Europæ orbitæ, pretium erat.

Per tuas planè lachrymas, cum aliud iter non pateret,

Salus publica, ad Bonæ Spei Portum appulit.

Ad luctus ergo & lachrymas


Ab il-

Ab illo, Magno plane, Carolo, relicta
Soli nubens dolori;
Quem diutius superstitem habere non potuisti,
Eum funeris magnificentiâ voluisti æternare.
Nihil egisti, inimicum, magnis Nominibus, Fatum.
Quem tu Imperatorem eripuisti Tempori;
Eum, consors Illustrissima, restituit Immortalitati.
Poterat ille credi nunquam mortuus:
Qui non minus in recenti Posterorum memoria;
Quam in amico Illustrissimæ consortis pectore,
Semper vixit superstes.
Ne hodie quidem cum illa sepeliri dicendus est.
Quæ vt æternum, post sua etiam fata, viuat, effecit.
Et quia viuacissimus extincti amor,
Posthumis honoribus, semel satiari non poterat:
Primi funeris Magnificentiâ, non contenta;
Alterum, multis magnisq; instaurauit impensis.
Vidisti tum Volhynia, nouam planè I hænicem;
Quàm ex fecundo cinere, non iam Solis radij,
Sed coniugalis Luna, amicus splendor,
Ad nouam planè animabat vitam.
Dubium erat, Funusne illud dicendum esset? an triumphus?
Adeo, vt tum demum victoriosum cadauer,

Cum Ostrogij
è Templo Pa-
rochiali, ad
Colleg: Soc:
Iesv transfe-
retur.

De Orientis Tyranno
Triumphalem pompam egisse videretur:
Aut, ne tot laureis dignissimus Imperator,
Semel tantum Triumpharet,
Per Illustrissimam Coniugem stetisse.
Ita noua sæculi nostri Arthemisia,
Meliori Mausolo parentans;
Recentissimo exemplo,
Antiquam Orbi nostro commendat Virtutem.
Cineres Mariti, vt prior illa, non bibit:
Nihil enim citius concoquitur,
Quam grata amicorum memoria.
Hanc vt semper in se Princeps nostra foueret,
Maluit, mortui coniugis Spiritum haurire,
Quàm cineres.

Alex: ab Alexo



INSCRIPTIO XV.

In Literarum Studia Liberalitas.

Lugete Principum funeribus, vœtigales Musæ.
Vos hîc vel maximè decet esse Præficas.

In Principis nostræ funere,

Virtutes aliæ deplorant, alumnam,

Vos Munificam ploratis Parentem.

Lugete damna vestra, si aliena dissimulatis.

Inde vobis obijciantur argumenta luctuum;

Vnde semper antea, materiem habuistis gaudiorum.

Agite, immortalibus in vos meritis,

Parem grati animi Talionem reponite.

Quæ vos dum viueret, meliori spiritu animauit,

Eandem vos post funera animate.

Sub qua & spiritum recepistis, & sanguinem:

Par est vt vestro illa respiret spiritu;

Vestra viuere incipiat vita.

Ita plane est,

Princeps, vel inter Sepulchrales tenebras, Illustrissima.

Quæ meliorem Literarum studijs animam inspirasti;

Posthumam ab eis ne despèra vitam.

Adeò splendidè erecta, & dotata à te Sapientia;

Vœtigalem tibi immortalitatem pollicetur.

Cùm adeò liberalem pauperibus Musis, dotem assignasses,

Vt plures in earum studia excitentur, effecisti,

Artes singulas, ita fouisti; ac si didicisses:

Ita æstimasti, ac si calluisses.

Parùm dixi:

Tanto in Musas amore exaristi,

Vt vna ex eis fuisse videreris:

Aut illæ omnes in animam tuam commigrasse.

Fuerit fabulosa Memnosyne earum Parens,

In te meliorem illæ sunt expertæ Matrem.

Assentior ingenioso lemmati tuo,

Magne olim, Regni nostri Cancellarie,

MAGNE THOMA ZAMOYSKI.

Cùm in armatæ Palladis imagine, Principem nostram figurasses,


Ipsius planè viuam effigiem expressisti.

Pallas à te credita, Pallas picta,

Ipsissima Pallas fuit;

Comes
Natal,

Non minus docta, quam armata.
Nobilissimæ cogitationi tuæ, ipsa fauit veritas;
Ipsa Poëtarum fides suffragata est.
Hæc quoque Minerua ex Paterno nata cerebro,
Omnem Patris genium exhaustit.
Se Viduam propè est oblitâ,
Cum citra dolorem parturientium, tot Liberorum Mater esset.
Frustra sterilem, eius viduitatem dicamus.
Tot illa habuit Liberos,
Quot Liberorum Ciuium liberos,
Literarum studijs fecit vectigales.
Horum illa, parte meliori & Mater, & Parens;
Cum literatæ educationi, adeò liberaliter prouidisset;
Omnes Parentum omnium superauit affectus.
Quis igitur illi iure succenseat,
Quod destinatam Schismaticorum Hospitalidorem, Surasæ
In Volhynensium Nobilium liberos, transtulisset?
Maluit valetudinarium illud, Saluti Patriæ dedicare.
Maluit vt dignas Cœlo & Reipublicæ nutriret animas;
Quàm debitas Orco, saginaret victimas.
Aegris Schismaticorum corporibus, destinatum receptaculum,
Ad curandos animorum morbos transtulit.
Id est, maluit prouidere,
Ne sani corpore, animo ægrescerent:
Quàm, ne vtroque laborantes,
Post liberalem Ducalium impensarum stipem,
In vtriusque mortis censum transcriberentur.
Istud nimirum est Hæredem sibi Famam scribere:
Et nunquam morituræ Liberalitati,
Viuas spirantesque Columnas erigere.
Absistant Egyptiæ Pyramides:
Mausolea & Babilonici fideantur Obelisci.
Tibi Literarum Mecænas Illustrissima
Tot Columnæ, animatæque Pyramides stabunt:
Quot in Palladio Amphitheatro Ingenia,
Liberalibus impensis tuis erexisti.
Cætera Principum beneficia, cum tempore effluunt:
Sola eos Literarum studia, possunt æternare.



INSCRIPTIO XVI.

Pia in Egenos Munificentia.

Accedite pupilli miserorum greges.
Illius hodie Principis funus effertur,
Sub qua ipsa Paupertas, diues poterat æstimari.
Parum est diuitijs pretium addere:
Ipsam locupletare Egestatem, maius quiddam est.
Præstitit hoc dum viueret,
ANNA ALOYSIA CHODKIEWICIA
Ducissa in Ostrog,
Omnium egentium non tam Patrona, quam Parens.
Tot sustentatis miserorum centurijs
Veram se illa, ipsius Paupertatis Matrem, probauit.
Quæ adeò largâ eam vbique dote subleuaret:
Et maternis planè foueret obsequijs.
Adeste igitur atratæ pauperum turmæ.
Deesse vobis hic lacrymæ non poterunt.
Siue ad euanescentem beneficentiæ fontem;
Siue ad angustias vestrâs respicitis;
Facile ob oculis, lacrymas vtrò fluentes, impetrabitis.
Nemo vos ab hac tumba arceat.
Qui, viuæ Palatium numerofo Exercitu obsedistis;
Eiusdem vitâ functæ Sarcophagum,
Densiori coronâ præcingite.
Inter tot excubantium armatorum cohortes,
Non satis se tutam rata;
Vos illa ad Palatij sui excubias conscripsit.
Qui vbique viuam, tanto numero comitati estis;
Par est, vt eam hodie numerofo comitatu,
Ad Coeleste Capitolium deducatis.
Vobis illa Metatoribus vsa,
Æternam sibi in cœlis Domum construxit.
Quò vt facilior ei pateret accessus;
Iam olim suum per vos aurum, illuc transmisse.
Erige te ad tantæ Liberalitatis exemplum, Hospes.
Ne & tu diuitias tuas amittas;
Eas, per manus inopum ad cœlum præmitte.
Huc iam tibi Princeps nostra præiuit.
Quò, vt tu etiam magno passu sequaris;
Tot in terris beneficentiæ suæ, vestigia reliquit.

Pienti-

Pientissima miserorum Parens,
Inopum miseras, ficcis oculis videre non iustitens;
Sæpe ex eorum oculis lacrymas, transtulit, in suos.
Eorum doloribus ægra, eorum egestate afflicta:
Se in illis egere, se abundare putauit.

Nemo est qui meminerit eam,
In causa Pauperum prece irritâ rogatam:
Ex quibus solos quos non nouerat non aluit.
Maiori animi voluptate, illis beneficia fænerans,
Qui soluendo non essent:

Fideiussorem Deum, ita sibi deuinxit;
Vt omnibus facultatibus suis, exui non timeret.
Hinc ad Paupertatis vsque periculum

Profusa in Pauperes:

Ita illis sua dedit omnia,

Ac si seipsam etiam debuisset.

Quidquid in eos non erogaret perdidisse:

Quidquid eorum precibus negaret,
Suis illud damnis accessisse, credidit.

Et quia ad uitalitia Liberalitas,
Munificentissimum pectus explere non poterat:
Vt etiam post fata miserorum inopiam subleuaret,

Liberalissime prouidit;

Atque se in donis fecit superstitem.

Tot erectis Prytaneis, tot dotatis;

Ipsam quodammodo Aternitatem,

Beneficentiæ suæ uoluit obligare.

Omittere tamen omnia hæc potuit,

Si seipsam in terris æternare potuisset.

Illius præsentia,

Optimum contra omnes fortunæ iniurias, præsidium fuit.

Et quia in ferrea tempora inciderat:

Sæculi sui commune remedium;

Ampliores se in eius angustiis fecit.

Tum maximè in pauperes profusa;

Cum maximè ad eorum fortunam accederet.

Certamen quoddam cum Fortuna instituisse videbatur.


Plusne inconstans Numen, sibi & alijs eripere;

An munificentissima Princeps, conferre potuisset.

Si non Thesaurum;

Cor certè Princeps nostra tale habuit,

Quod nullis beneficijs potuerit exhauriri.



INSCRIPTIO XVII.

Modestia, & Fortunarum contemptus.

Abfiste Romane Plini.

Aliorum Principum importunus es Monitor;

Plin. in Paneg.
Troiani.

Nostræ verò Principi minimè necessarius.

Nouerat illa, & fite, tuaque minùs nouerat:

Non minùs se Hominem esse;

Quàm Hominibus imperasse.

Priuatì modestiâ, erumpentem à se maiestatem coercens;

Vel in hoc omnibus maior est habita,

Quod nulli esse dedignaretur æqualis.

Aliàs cognatus multorum Purpuræ lethargus est.

Id est profunda sortis humanæ obliuio.

Pedissequa est magnorum Honorum arrogantia.

Plerique, Homines se propè obliuiscuntur,

Dum se Principes esse meminērunt.

At verò Princeps nostra,

Genere, genio, ingenio, maxima;

Naturæ, & Fortunæ donis eximia;

Adhuc quomodo cresceret, se se deiiciendo inuenit.

Nihil enim homines, supra homines magis attollit;

Quàm ad omnem Humanitatem inclinata Modestia.

Heu! quoties hic basilicè delinquitur.

Quanti sunt! qui Fastu & Ambitione,

Magnitudinem suam attollunt.

Si tamen Prudentum suffragia consulimus:

Nihil magis Principum staturam auget, quàm Demissio;

Nihil deprimit magis, quàm supra alios se se attollens Ambitio.

Omnis quippè Fastus ruinæ vicinus est:

Et nunquam in solido stetit, superba felicitas.

O quàm melius Princeps nostra,

Cum se, ab omni fastu aliena, infra cæteros deprimeret,

Supra cæteros meruit collocari:

Tum demum verè maxima,

Cum se omnium minimam reputaret.

Quantum hoc sit in Purpura miraculum,

Ille te doceat, qui olim auferuit:


Rebus modicis, facile equalitatem haberi:

Tacitus,

At verò crescentibus, difficile est Fortunam circumscribere.

Omnium honori æquè addicta, quàm amica Virtuti:

Se vnam habuit, quam contemneret,
Se vnam, quam non amaret.
Ita status, staturæque suæ conscia,
Vt nulla eam inflaret Ambitio.
Nimirum, tumor mentis; morbus est, non Magnitudo.
Quidquid leue ac inane est, populari se aurâ attollit:
Solidæ dignitatis gloria, suâ se virtute commendat.
Nec est cur tantam in Purpura Modestiam mireris.
Generoso rerum omnium Humanarum fastidiò,
Plura Princeps nostra calcare maluit, quàm possidere.
Cum & se mundo aptare nolle;
Et Mundum sibi non posse:
Illius Pompam omnem, temnere maluit, quàm suspicere.
His maximè diuitijs inhians,
Quibus venale Cælum exponitur:
Omnium Fortunarum pretio, nihil habuit viliùs;
Nihil, earum contemptu, reputauit pretiosius:
Nec quidquam in illis amauit magis,
Quàm, quòd & sine vitio prodigi,
Et cum lucro possent contemni.
Communi totius Patriæ Fato afflictâ, non suo:
Bonorum omnium iacturam ita tulit;
Ac si nihil vnquam amisisset:
Asperiori Fortunæ ita se accommodauit;
Ac si in illa, & ad illam, nata fuisset.
Si nimium curiosus in vitam eius inquiras,
Deo natam esse credas, non Mundo.
Tantis ab eo culta Honoribus, & ditata Fortunis,
Ita vtramque parui æstimauit;
Vt mundo potius nunquam adhæsisse,
Quàm illi valedixisse visa fuerit.
Felix omninò & fortunata Princeps,
Quæ scierit perituræ Felicitati detrachere,
Quod lucraretur Æternæ.



INSCRIPTIO XVIII.

Deiparæ cultus propagatus.

Cum hîc inter Ducalia stemmata Lunam videris
Eam quoque Marianis pedibus substratam fuisse ne dubita.

Singularis Principis nostræ,

In promouendo Magnæ Dei Matris cultu Pietas,

Iam olim gentilitiam Lunam suam, vnâ secum,

Ad Virgineos pedes supplex abiecit.

An non plenior inde euaserit? facile is concludet;

Qui MARIAM SOLE vestitam,

Apoc: 12.

Adeoque SOLEM ipsum dictam esse non ignorat.

Cant: 6.

Et verò quidni peculiari amore MARIAM coleret?

Quæ ab ANNA genita, & ipsa ANNA fuit.

Vt Matris & filiæ geminatos affectus,

In vno Nomine Venereris;

Imò Matrem & Filiam, in corde eodem agnoscas.

Sanè Princeps nostra, vtriusque tituli maiestatem,

Si non ad viuum expressit; proximè æmulata est.

Virginem Deiparam, vt Matrem semper coluit;

Dotauit vbiq; vt Filiam.

Eam deniq; bonorum suorum Hæredem inscripsit.

Hinc illa omnigenæ supellectilis pompa,

Et quidquid à prouida Matrum cura,

In Filiarum Dotem laboratur.

Hinc Marianarum virtutum sollicita æmulatio.

Hinc, Sanctissima Dei Mater, à Principe nostra,

Filialibus planè culta & amoribus, & moribus.

Accessit *Claro-Monti* ex illius munificentia noua lux.

In eo quoque apice Ducalis Liberalitas fulsit.

Gratulata Dei Matri, quod in Polonia,

Adeò *Clarum-Montem* vel inuenisset, vel fecisset;

Suâ quoque pietate eum illustrare non neglexit.

Appensis ad Deiparæ effigies donarijs non contenta;

Magnum ipsa Thaumaturgæ Virginis Miraculum,

Magnum vbiq; ac viuum Anathema fuit.

Singulos dies Marianis horis distinguens,

Horas omnes Virgineis dedicans auspicijs;

Nouum planè Horologium Principum,

Non tam delineasse visa est, quàm extitisse.

Purissimo eius Conceptui dedita, plurimum sibi gratulata est,
Armatum inter gentilitias Ceras suas habuisse Equitem,

Qui victrici hastâ Draconem premetet:

Mariani scilicet de Dracone triumphî, non inane Symbolum.

Hinc in Equite, suauiter equitantem Gratiam,

In Dracone primigenium Serpentem interpretata;

Nunquàm illi, non festum Pæana cecinit,

Quæ Originarij Draconis dirum caput,

Prius triumphali plantâ oppressit, quam terram premeret.

Augustum MARIÆ Nomen, irrefragabile Argumentum rata;

Nihil vnquam negauit, quod in eo postularetur.

Diceres, illi se omnino conformare voluisse,

Qui nos omnia habere voluit per MARIAM;

Bernard.

Aut indignum iudicasse,

Vt aliquam preces illæ paterentur ab hominibus repulsam,

Quæ eius nomine essent consecrata,

Cui nihil vnquam, Deus ipse, negauit.

De te verò quid dicam?

Quæ dolentis Dei imaginem materno sinu complexa,

In Suburbanis Iaroslauia Campis,

Ingentem gratiarum messem aperis Virgo!

Certauit in te ornanda ac dotanda, Mater & Filia.

Quam olim Parens multo pretio redemptam,

(Summâ in terris Potestate annuente)

Conscriptis sub Duce IESU, Excubitoribus custodiendam tradidit;

Huic Filia, munificam Dotem, inscripsit.

Digna nimirum fuit Principe nostra Liberalitas,

Hospitantem in auito solo *Mundi* totius *Dominam*,

Munificentioribus sustentare impensis;

Et post sua Fata providere,

Ne tanta Maiestas,

Quæ inter Ciues suos censerî non est dedignata,

Adeò angustè apud se habitaret.

Ita Dolorosæ Matris dolores & angustias solata;

Cuius amorem, semper fouit in pectore,

Eandem moribundo ore MATREM sapius inclamauit;

Vt vel inde agnosceres,

ANNAM ALOYSIAM CHODKIEWICIAM,

Ab ANNA Matre Tempori,

A MARIA Virgine, genitam Æternitati.



INSCRIPTIO XIX.

Mors Sanctissimè obita

Tot FLORVM quos hîc legisti; Hospes,
MORS BEATA, Fructus est.

Vt enim nemo benè mori potest, qui male vixerit:
Ita qui benè vixit; optimæ Morti bene prælusit.

Fecunda multis virtutibus vita, *1654*

Bonæ Mortis Præludium est, ac quoddam veluti Proœmium.
Hoc tamen vnum est, quod de te sine lacrymis cogitare non possumus,

Magna Princeps.

Infelices nobis illæ Iani Kalendæ,

Quas tu, Felicitatis tuæ (ita enim Mortem appellabas) auspices salutasti.

Palam elocuta, Annum illum tibi fore extremum;

De luctibus nostris, (Anna planè Prophetissa, Vidua) prophetasti.

Meritò Mensis ille Aquario subiectus est;

Cui tot lacrymas vniuersa affudit Polonia.

Diceres, ipsosmet Cœlos fletibus nostris suppetias tulisse.

Aut DVCALI LVNÆ, Lunam cœlestem parentare voluisse.

Nec est cur Fatis succenseamus, quod te alieno in Solo extinxerint.

Vt omne Solum Forti Patria est:

Ita nulla Terra, aliena est mortuo.

Quotquot nascimur, peregrinamur à Domino.

Erras, quisquis vitam hanc, stabilem Possessionem existimas.

Nonnisi breue, ac nimis incommodum, Diuersorium est.

Vt desint alia, illud te Princeps nostra docuit.

In acerbo Fortunarum suarum Exilio, exulare desinens;

E vita, veluti è diuersorio ad Patriam, libens euolauit.

Nempe Æternitatem meritis, vndique Cœlum patet.

Æqualis vndique ad illud via; idem planè iter est.

Quantumlibet inuerecunda Mors existimetur,

Horruit tamen in Subditorum oculis Principem adoriri.

Vt in Orbe remotiori scelus suum vtcunq̃ abseonderet;

Penè exulantem, peregrè affecuta, interemit.

An potius tanto Fato MAIOR POLONIA debebatur?

Quæ ingentibus ærumnis, & his maiori Patientiæ,

Capacem, per tot annos, in se locum dedit;

(Magnam enim Exulem, nisi MAIOR POLONIA non caperet.)

Eadem ingenris animæ, magnos Manes,

Ad maiorem Nominis sui amplitudinem, meruit adijcere.

Sed heu! tituli huius mensuram, excessit ingens fatum.

Agnoscite damna vestra diuersi, Tractus.

Mærenti Russiæ, accedat vtraque Polonia.

Ita Princeps nostra vixit apud omnes;

Vt sine omnium damno mori; sine luctu, efferri non possit.

Anni 1654
quem se
non finitu
ram præ-
dixit.

Aquari-
us Ianu-
arij signū.

At neque Suprema Fati illius dies suo caruit Sacramento.

27. Ianuarij
S. Chryso-
stomus.

Aureo illa Oratori fuit consecrata.

Quo putas id factum esse mysterio?

Nempe, aut Princeps nostra,

Coram Supremo Tribunali Causam dictura,

Adeò disertum sibi adlegit Patronum:

Aut præscium luctus nostri Cœlum,

Aureum ad nos misit Oratorem;

'Qui & tantæ iacturæ damnum emolliret;

Et nobis, ne Principem optimam Cœlo inuideremus, persuaderet.

Et verò, eloquentiâ Aureus, tolerantia Ferreus Antistes,

Auræ Principi, non solum tolerabilem; sed etiam

De nomine suo *pretiosam Mortem* fecit.

Ille quoque olim in Exilio Patriam inuenit.

Vt simile in Principe nostra fatum admiratus,

Non dissimilem, vitæ simillimæ, terminum, ei gratuleris.

S. Chryso-
stomus in
Exilio mor-
tuus.

Ita æternum victura Princeps

Tanto migrationis suæ, seu præduce, seu comite,

Ad Æternitatem non tam abiit, quam euolauit.

Mortem ne suo quidem dignata metu;

Libero vultu communem necessitatem excipiens,

Superuenientem ac si vocasset admisit.

Non ita semel eam viderat, ut sibi tum esset timenda.

Duos supra decem dies, quotidie Pane Angelico refecta;

Immediatè
ante ipsum
obitum.

In ipsam alimenti Sanctimoniam abiisse videbatur.

Diceres; aut Cœlestibus epulis in tempore assueuisse:

Aut, ne ad Mensam Æternitatis ieiuna omnino accederet,

Ita famescientem animam, Pane Diuino, saginasse.

Tandem ad Supremam luctam ritè inuncta,

Secundâ noctis Horâ ad æternam se quietem composuit:

Et consueto somni tempore, obdormiuit in Domino.

Annos quibus vixit inquiris? potius quibus victura est computa.

Quam, Mortalitas LIV. annorum angustiis circumscripsit;

Huic vectigalis Immortalitas, *Annos Æternos* inscribit.

Si ad desiderium nostrum respicimus, parum;

Si ad res gestas, satis vixit:

Si ad memoriam operum quæ fecit,

Semper victura est.



J N S C R I P T I O X X .

Heu! quam tempestiuè

Rerum Humanarum exitus, suis respondent initijs!

Deductus ex Illustri fonte riuus,

Tandem ad caput suum refunditur.

Illustrissimorum ROSSIÆ, DVCVVM, Augustum genus,

E Maiori Polonia, per ROR KO Rossia Ducem,

A WARAGIS ortum suum trahens;

Tan dè per ANNAM ALOYSIAM CHODKIEVICIAM,

Illustrissimorum Ducum ac Principum in Ostrog,

Neptem, Filiam, Sororem,

Maiori itidem Poloniae, refunditur.

Ibi Princeps nostra, mortalis esse desijt.

Redijstis ad primum Principium, Magni Manes.

Augustum tot Ducum & Principum circulum,

In hoc demum ferale punctum reduxistis:

Hoc est, affinem Aeternitatis Orbem,

Fine beatissimo conclusistis.

Erigite vos ad tantæ cladis rumorem,

Hæreditariæ Principis nostræ Fortunæ.

Nunc primum extrema vobis clades superuenit.

Stare hætenus, etiam tot inter rudera potuistis;

Nisi illa cecidisset, quæ ruinas vestras sciret efferre.

Fatalia sanè rudera! & infelices Ruinae!

In quibus ne Tumulum quidem, Heres vestra, inuenit.

Quæsierit olim Hecuba, in suo Troiam cinere:

Nostra hæc, Troia suæ cineri, adiecit suum,

Cui ferus inscribat Viator;

CVM POPVLO IACET HIC, ET IPSO

CVM REGE, REGNVM.

Atque hîc demum Gentilitij EQVITIS tui Deus Terminus esto,

PRINCEPS ILLVSTRISSIMA.

Post Turcicos, Scythicos, Moschouiticos,

Patriæ inhiantes Dracones, toties calcatos,

Cùm se ipsum, nobilis planè Curtius,

Non semel erumpentibus in Patriam flammis, deuouisset;

In hunc tandem Tumulum insilit:

Teque, post tot Meritorum & Honorum curricula,

Ad beatæ Aeternitatis Metam deuehit.

Reliquam Auitæ Nobilitatis supellectilem, ita dispono.

Vt nobis

Herbestein
in Moscho.
ex Annal.
Rossic An-
no D. 840
Antilogiū
Græcum in
vitâ Wolo-
dymiri.

Seneca in
Troad.

Sarbieu,
Lyr. lib.
2. Od 5.

Stemma
Illustris-
simæ,
vulgò
LVBART.

Liuius.

Vt nobis ad Immortalitatem iter pateat,
Gentilitiæ SOLEÆ vestigia, in terris relinquantur. Dabrowa,
Iure ab omnibus adoranda, quæ TERNA CRUX dedicauit.
Fractus ANNVLVS, Pronubæ Immortalitati;
Bina SAGITTA, Diuini Amoris Pharetræ, cedat. Ogonczyki,
Leliwa, &
Zaslau,
Vos quoque DVCALIA SIDERA,
Omnibus nobis lugentibus, supremum illuxistis.
A vobis Princeps nostra, & mores traxit, & ingenium.

A LVNA claritatem, non inconstantiam mutuata;

A SIDERE habuit, quod ipsamet Sidus esset.
Vtrumque non terris eam, sed Cœlis deberi ostendit.

Tandem è Cœlo petita; Cœlo debita Sidera,

Cœlis hodie, lugubres, reddimus.

Nunc demum LVNÆ huius Eclipsis est.

Nunquam aliàs deliquium passa; iam defecit.

Heu! breues Humanorum splendorum periodi!

Nulli, sine fatali lucis iactura, lucere permissum est.

ANNA ALOYSIA CHODKIEVICIA,

Suprema Illustrissimæ Domus suæ Hesperugo,

Occidens, Tempori, exoritur Æternitati.

Id est, Nouæ, quæ Noctem ignorat, DIEI,

ILLVSTRIS PHOPHORVS EST.

H O S P E S,

Principis Funus iam peractum est: restât tuum.

Abi, & vide, ne ita alienam mortem defleas,

Vt non memineris tuæ.

Cuiuscunque ætatis fueris; Senex, aut. Iuuenis,

Mortem contemne, quasi æternum victurus;

Vitam compone, propediem moriturus.

Vt enim non est possibile Senem diu viuere,

Ita impossibile non est,

Iuuenem citò mori.

A. M. D. G.



